

摛藻堂四庫全書薈要

史部

欽定四庫全書會要

史部

宋史卷一百九十四



詳校官編修臣王天祿

欽定四庫全書  
會要卷五千八百二十二

史部

宋史卷一百九十四

元中書右丞相總裁托克托等修

兵志第一百四十七

兵八

揀選之制  
廩給之制

揀選之制建隆初令諸州召募軍士部送闕下至則軍頭司覆驗等第引對便坐而分隸諸軍焉其自廂軍而升禁兵禁兵而升上軍上軍而升班直者皆臨軒親閱

非材勇絕倫不以應募餘皆自下選補咸平五年於環慶等州廂軍馬步軍六千餘人內選材勇者四千五百人付逐砦屯防以代禁兵景德二年宣示殿前侍衛司諸禁軍中老疾者衆蓋久從征戍失於揀練每抽替至京雖量加閱視亦止能去其尤者今多已抽還宜乘此息兵精加選揀雖議者恐其動衆亦當斷在必行昔太祖亦嘗患此遂盡行揀閱當時人情深以為懼其後果成精兵樞密使王繼英等曰今兵革休息不乘此時遂

選實恐冗兵徒費廩食帝曰然近者契丹請盟夏人納  
款恐軍旅之情謂國家便謀去兵惜費乃命先於下軍  
選擇勇力者次補上軍其老疾者俟秋冬慎擇將臣令  
揀去之三年正月詔遣樞密都承旨韓崇訓等與殿前  
司侍衛馬步軍司揀閱諸軍兵士供備庫使帶御器械  
綦政敏等分往京東西路揀閱八月詔效順第一軍赴  
京揀閱以補虎翼名闕是軍皆河東人帝念其累戍勞  
苦故升獎焉大中祥符二年四月詔曰江南廣東西路

流配人等皆以自抵憲章久從配隸念其遠地每用軫懷屬喬嶽之增封洽溥天之大慶不拘常例特示寬恩江南路宜差內殿崇班段守倫就昇州洪州廣南東西路差殿直閣門祗候彭麟就桂州與本路轉運使同勾抽諸州雜犯配軍揀選移配淮南州軍牢城及本城有少壯堪披帶者即部送赴闕當議近上軍分安排如不願量移及赴闕者亦聽若地理遠處即與轉運使同乘傳就彼依此揀選五年正月帝諭知樞密院王欽若等

在京軍校差充外處人員軍數不足有妨訓練可詔示  
殿前侍衛馬步軍司簡補禁軍逐指揮兵士內捧日上  
三軍要及三百人龍衛上四軍各二百五十人拱聖驍  
騎驍勝寧朔神騎雲武騎各三百五十人並於下次軍  
營升填須及得本額等樣及令軍頭司於諸處招揀到  
人內選填營在京者引見分配在外處者準此仍委逐  
司擘畫開坐以聞在京差出者候替回揀選九年十一  
月詔河北河東陝西諸州軍揀料本城兵五百人以上

升為一指揮於本處置營教閱武藝升為禁軍天禧元年二月遣使分往諸州軍揀廂軍驍壯及等者升隸上軍六月召選天下廂兵遷隸禁軍者凡五千餘人天聖間嘗詔樞密院次禁軍遷補法凡入上四軍者捧日天武弓以九斗龍衛神衛弓以七斗天武弩以二石七斗神衛弩以二石三斗為中格恩冀員僚直驍捷軍士選中四軍則不復閱試自餘招揀中者並引對凡員僚直闕則以選中上軍及龍衛等樣弓射七斗合格者充仍

許如龍衛例選補班直凡選禁軍自奉錢三百已上弓  
射一石五斗弩蹠三石五斗等樣及龍衛者並親閱以  
隸龍衛神衛凡騎御馬直闕小底則閱拱聖驍騎少壯  
善射者充凡弓手內殿直以下選補殿前指揮使射一  
石五斗御龍弓箭直選補御龍直御龍骨朵子東西班  
帶甲殿侍選補長入祇候御龍諸直將虞候選補十將  
射皆一石四斗東西班散直選補內殿直捧日員僚直  
天武龍衛神衛親從選補諸班直御龍骨朵子直弓箭

直將虞侯選補十將御龍直長行選補將虞侯射皆一  
石三斗員僚龍御騎御馬直小底選補散直射皆一石  
二斗凡弩手東西班帶甲殿侍選補長騎祇候射四石  
御龍弩直將虞侯選補十將射三石八斗長行選補將  
虞侯射三石五斗其捧日天武龍衛親從選補弩手班  
御龍弩直者亦如之其次別為一等減二斗自餘殿前  
指揮使諸班直以歲久若上名出補外職者所試弓弩  
斗力皆遽減弓自一石三斗至八斗弩自三石二斗至

五斗各有差凡班直經上親閱隸籍者有司勿復按試  
其升軍額者或取少壯拳勇或旌邊有勞至於河清遽  
補牢城配軍亦間下詔選補蓋使給役者有時而進負  
罪者不終廢也其退老疾則以歲首或出軍回轉員皆  
揀汰上軍以三歲河北遇大閱亦如之景祐元年詔選  
駢駿填拱聖諸軍退其老疾為剩員不任役者免為民  
三年詔選駢騎雲騎駢勝填拱聖武騎寧朔神騎填駢  
騎康定元年選御輦官為禁軍輦官二十六人遮輔臣

誼訴斬其首二人餘黥隸嶺南卒選如初慶厯三年詔  
韓琦田況選京師奉錢五百已上禁軍武技精捷者營  
取五人樞密院籍記姓名以備驅使况因言今天下兵  
踰百萬視先朝幾三倍自昔養兵之冗未有若是且諸  
路宣毅廣勇等軍孱弱衆甚大不堪戰小不堪役宜分  
遣官選不堪戰者降為廂軍不堪役者釋之上然其言  
皇祐元年揀河北河東陝西京東西禁廂諸軍退其罷  
癃為半分甚者給糧遣還鄉里係化外若以罪隸軍或

嘗有戰功者悉以剩員處之三年韓琦奏河北就糧諸軍願就上軍者許因大閱自言若等試中格舊無罪惡印部送闕量材升補乃詔四路都總管司自今春秋閱委主管選長五尺六寸已上弓一石五斗弩三石五斗者并家屬部送闕嘉祐二年詔神衛水軍等以五年諸司庫務役兵以三年一揀五年選京東西陝西河北河東本城牢城河清裝御馬遞鋪卒長五尺三寸勝帶甲者補禁軍其嘗犯盜亡坐黥者配外州軍歸遠壯勇八

年右正言王陶奏天下廂軍以歲首揀至於禁軍雖有駐劄還日揀法或不舉臣竊惟調發禁軍本籍精銳軍出之時尤當揀練請下有司凡調發禁軍委當職官汰年六十已上將校年六十五已上衰老者如此則兵精而用省矣下其章殿前馬步軍司奏曰舊制遣戍陝西河北河東廣南被邊諸軍悉揀汰餘路則無令請自今諸軍調發悉從揀法詔可又詔凡選本城牢城軍士以補龍猛等軍者並案籍取賞給奉錢五百及龍猛等者

以配龍猛其不及等與嘗給奉錢四百以下若百姓縣  
隸及龍騎等者以配龍騎其龍騎軍士戍還即選填龍  
猛自今本城牢城悉三年一揀著為令治平元年閱親  
從官武技得百二十人以補諸班直乃詔自今親從官  
限年三十五以下者充又詔如聞三路就糧兵多老疾  
不勝鎧甲者可勿拘時揀年五十以上有子弟或異姓  
親屬等應様者代之如無聽召外人是歲詔京畿并各  
路揀龍騎壯勇歸遠本城牢城宣効六軍河清車營致

遠窑務鑄錢監屯田務隸籍三十年勝鎧甲者部送京  
師填龍猛等軍其自廣南揀中者就填江西荆湖歸遠  
閼額仍詔每三年以龍猛等軍閼數聞又詔諸路有步  
射引弓兩石礪弩四石五斗已上者奏遣詣閼二年詔  
京東教閱補禁軍先是京東教閱本城自初置即番隸  
本路巡檢久不選補上聞其軍多勇壯可用者欲示激  
勸故有是詔治平四年正月揀選拱聖神勇以下勇分  
以補捧日天武龍神衛閼數元豐三年六月權主管馬

步軍司燕達言內外就糧退軍二十一指揮八千餘人  
以禁軍小疾故揀退及武藝淺弱人配填既不訓練又  
免屯戍安居冗食耗蠹軍儲若自今更不增補庶漸銷  
減候有闕依禁軍選募教習武藝不數年間退軍可盡  
變銳士內奉錢七百者減為五百依五百奉錢軍等杖  
招揀從之仍詔上四軍退軍改作五百奉錢軍額八月  
殿前步軍司虎翼十指揮出戍歸營閔其勞苦詔並升  
補為神勇指揮廣西路經畧司言雄畧澄海指揮闕額

請以諸路配送隸牢城卒所犯稍輕及少壯任披帶者  
選補從之四年四月提舉河北義勇保甲獄諮言舊制  
諸指揮兵給內有老疾年五十五已上有弟姪子孫及  
等杖者令承替名糧其間亦有不堪征役者乞年四十  
已上許令承替詔河北馬步諸軍依此十二月詔諸班  
直上四軍毋得簡常有罪改配人元祐二年七月詔諸  
路每歲於八月後解發試武藝人到闕殿前司限次年  
正月軍頭司限二月以前試驗推恩呈試武藝人同三

年閏十二月樞密院言在京諸軍兵額多闕而京東西  
路就糧禁軍往往溢額詔差官往逐路同長使揀選發  
遣以補其數大觀元年四月詔曰東南諸郡軍旅之事  
久失訓齊民雖浮弱而阻山帶江輕而易搖安必慮危  
誠不可忽其諸軍事藝生疎精熟不同非獨見將官訓  
練優劣實亦繫教頭能否樞密院請委逐路提舉訓練  
官妙選精熟教頭二年一替若能訓練精熟然後推賞  
從之至若省併之法凡軍各有營營各有額皇祐間馬

軍以四百步軍以五百人為一營承平既久額存而兵  
闕馬一營或止數十騎兵一營或不滿一二百而將校  
猥多賜予廩給十倍士卒遞遷如額不少損帝患之熙  
寧二年始議併廢陝西馬步軍營三百二十七併為二  
百七十馬軍額以三百人步軍以四百人其後凡撥併  
者馬步軍營五百四十五併為三百五十五而京師府  
界諸路及廂軍皆會總畸零各足其常額凡併營先為  
繕新其居室給遷徙費軍校員溢則以補他軍闕或隨

所併兵入各指揮依職次高下同領帝嘗謂輔臣曰天下財用朝廷稍加意則所省不可勝計迺者銷併軍營計減軍校十將以下三千餘人除二節賜予及僉從廩給外計一歲所省為錢四十五萬緡米四十萬石細絹二十萬匹布三萬端馬藁二百萬庶事若此邦財其可勝用哉初議併營大臣皆以兵驕已久遽併之必召亂不可帝不聽獨王安石贊決之時蘇軾言曰近者併軍蒐卒之令猝然輕發甚於前日矣雖陛下不恤人言持

之益堅而勢窮事礙終亦必變他日雖有良法美政陛下能復自信乎樞密使文彥博曰近多更張人情洶洶非一安石曰事合更張豈憚此輩紛紛耶帝用安石言卒併營之自熙寧以至元豐歲有併廢元符二年樞密院言已詔諸路併廢砦砦減罷兵將鄜延秦鳳路已減併餘路未見施行詔涇原熙河蘭會環慶河東路速議以聞三年罷都護府安撫使隸河蘭州以省餽運詔邊帥減額外戍兵建中靖國元年減放秦鳳路土兵大觀

三年詔昨降處分措置東南利害深慮事力未辦應費  
不貲其帥府望郡添置禁軍諸縣置弓手並罷其壯城  
兵士令帥府置一百人餘望郡置五十人舊多者自依  
舊沿邊州軍除舊有外罷增招壯城帥府望郡養馬并  
步人選充馬軍指揮及支常平錢收耀封椿斛斗指揮  
並罷已添置路分鈴轄路分都監許令任滿江南東西  
兩浙各共差走馬承受內臣一員帥府添置機宜文字  
去處並罷四年詔四輔州各減一將其軍兵仰京畿轉

運司將未足額并未有人崇銳崇威崇捷崇武內併廢  
四十四指揮已揀到人隨等杖撥填四輔見闕禁軍仍  
將逐輔係將不係將軍兵以住營遠近相度重別分隸  
排定及八將訓練駐劄去處疾速開具以聞河北河東  
崇銳崇威河東十八指揮河北不隸將十三指揮併廢  
見管兵令總管司撥填在京禁軍闕額河北路撥不盡  
人發遣上京分填在京禁軍闕額河東撥不盡人並於  
本路禁軍額外收管宣和五年詔兩浙盜賊寧息其越

州置捕盜指揮可均填江東淮東三路州軍闕額至神宗之世則又有簡汰退軍之令治平四年詔揀拱聖神勇以下軍補捧日天武龍衛神衛兵闕熙寧元年詔諸路監司察州兵招簡不如法者按之不任禁軍者降廂軍不任廂軍者免為民二年從陳升之議量減衛兵年四十以上稍不中程者請受呂公弼及龍圖閣直學士陳薦皆言退軍不便三年二月司馬光亦曰竊聞朝廷欲揀在京禁軍四十五以上微有呈切者盡減請給兼

其妻子徙置淮南以就糧食若實有此議竊謂非宜何則在京禁軍及其家屬率皆生長京師親姻聯布安居樂業衣食縣官為日固久年四十五未為衰老微有呈切尚任征役一旦別無罪負減其請給徙之淮南是橫遭降配也且國家竭天下之財養長征兵士本欲備禦邊陲今淮南非用武之地而多屯禁軍坐費衣食是養無用之兵寘諸無用之地又邊陲常無事則已異時或少有警急主兵之臣必爭求益兵京師之兵既少必須

使使者四出大加名募廣為揀選將數倍多於今日所退之兵是棄已教閱經戰之兵而收市井吠噦之人本欲減冗兵而冗更多本欲省大費而費更廣非計之得也臣愚欲願朝廷且依舊法每歲揀禁軍有不任征戰者減充小分小分復不任執役者放令自便在京居止但勿使老病者尚占名籍虛費衣糧人情既安於所習國家又得其力冗兵既去大費自省此國家安危所繫不敢不言右正言李常亦以為言從之是年詔陝西就

補其闕四年詔比選諸路配軍為陝西彊猛其以為禁軍給賜視壯勇為優隸步軍司後於逐路都監總管司詔廣東福建江西選本路配軍壯勇者合所募兵萬人以備征戍三月詔廣東路選雜犯配軍丁壯每五百人為一指揮屯廣州號新澄海如廣西之法七月手詔揀諸路小分年四十五以下勝甲者升以為大分五十已上願為民者聽舊制兵至六十始免猶不即許至是

免為民者甚衆冗兵由是大省十年遣官偕畿內京東  
西陝西荆湖長吏簡募軍士以補禁軍之闕元豐元年  
詔以馬軍選上軍上軍選諸班者並馬射弓一石力諸  
班直槍弩手闕選親從親事官餘並選擇日龍衛弓箭  
手二年雲騎軍闕二千一百以雲捷等軍補之六年騎  
兵年五十以下教武技不成而才可以肄習者並以為  
步軍元祐四年詔今後歲揀禁軍節級筋力未衰者年  
六十五始減充剩員八年涇原路經畧司奏揀選諸將

下剩員年六十以下精力不衰仍充軍以補闕額從之  
陝西諸路如之紹聖四年樞密院言龍騎係雜犯軍額  
闕數尚多今欲將禁軍犯徒兵及經斷者歲揀以填闕  
從之元符元年又言就糧禁軍闕額於廂軍內揀選年  
四十以下者填從之宣和七年詔京東西淮南兩浙帥  
司精選諸軍驍銳發赴京畿輔郡兵馬制置使司靖康  
元年詔軍兵久失教習當汰冗濫精加揀擇然不能精  
也方兵盛時年五十已上皆汰為民及銷併之久軍額

廢闕則六十已上復收為兵時政得失因可見矣中興以後兵不素練自軍校轉補之法行而揀選益精大抵有疾患則選有老弱則選藝能不精則選或由中軍揀補外軍或揀外邊精銳以升禁衛考軍防令諸軍招簡等杖天武第一軍五尺有八寸捧日天武第二軍神衛五尺七寸三分龍衛五尺有七寸拱聖神勇勝捷驍捷龍猛清翊五尺六寸五分驍騎雲騎驍勝宣武殿前司虎翼殿前司虎翼水軍五尺有六寸武騎寧朔步軍司

虎翼水軍揀中龍衛神騎廣勇龍騎驍猛雄勇吐渾擒  
戎新立驍捷驍武廣銳雲翼有馬勁勇步武威捷武衛  
牀子弩雄武飛山雄武神銳振武新招振武新置振武  
振華軍雄武弩手上威猛廳子無敵上招收冀州雄勝  
澄海水軍弩手五尺五寸廣捷威勝廣德克勝陝府雄  
勝驍雄威神虎保捷清邊弩手制勝青澗平海雄武  
龍德宮清衛寧遠安遠五尺四寸五分克戎萬捷雲捷  
橫塞捉生有馬雄畧効忠宣毅建安威果全捷川效忠

揷中雄勇懷順忠勇教閱忠節神威雄畧下威猛五尺  
四寸亳州雄勝飛騎威遠蕃落懷恩勇捷上威武下威  
武忠節靖安川忠節歸遠壯勇宣効五尺三寸五分濟  
州雄勝騎射橋道清塞奉先奉國武寧威勇忠果勁勇  
下招收壯武雄節靖江武雄廣節澄海懷遠寧海刀牌  
手必勝五尺三寸揷中廣効武和武肅忠靖三路廂軍  
五尺二寸建炎三年詔江南江東兩浙諸州軍正兵土  
兵除鎮江越州委守臣兵官巡檢六分中選一分部轄

人年四十五以下長行年三十五以下合用器甲候旨  
選擇赴行在有懷弱不堪年甲不應或占庇不如數選  
發其當職官有刑四年詔神武義軍統制王瓊下閱到  
第三等軍兵一千六百六十人填廂禁軍其不任披帶  
者分填嚴州新禁軍紹興二年上謂輔臣曰郤清單德  
忠李捧三盜招安至臨安日从卿等其極揀汰呂頤浩  
秦檜得旨與張俊同閱視堪留者近七千人詔命張俊  
選精銳得兵五千人詣行在二十年樞密院言都統吳

玠選中護衛西兵千人詔隸殿司又統制楊政選西兵三百二十五人填步軍司二十四年詔御龍直見闕數可以殿步二司選拍試填諸班乾道二年詔王琪選三百人充馬軍慶元三年殿司言正額効用萬一千五百九十二人闕二百五十九人於雄効內及効用帶甲拍試一石力弓三石力弩合格人填闕額詔崇政殿祇候親從填班直人數特與免其三衙舊司官兵及御馬直合揀班人照闕額補嘉定十一年臣僚言今軍政所先

莫如汰卒謂如千兵中有百人老弱遇敵先奔即千人皆廢矣乞嚴敕中外將帥務覈其實其省併法自咸平始建炎以後臣僚屢言軍額有闕則併隸一等軍分足其舊額以便教閱而指揮制領將佐之屬亦或罷或省悉從其請蓋當多事之秋患兵之不足望增補以壯軍容事既寧息患其有餘必併省以覈軍實意則在乎少蘇民力也嘉熙初臣僚言今日兵貧若此思變而通之於卒伍中取強勇者異其籍而厚其廩且如百人之中

揀十人或二十或三十則是萬人中有三千兵矣時試之弓弩課之武藝暇則馳馬擊毬以為樂秋冬使之校獵其有材力精彊則厚賞賚之又於其中拔其尤者數愈少而廩愈厚待之如子弟倚之如腹心緩急可用蘇轍有言天子必有所私之將將軍必有所私之士又必申命主帥制領鼓動而精擇之假之統御之權嚴其階級之法將樂與士親士樂為將用則可以運動如意不必別移一軍別招新軍矣咸淳間招兵無虛日科降等

下錢以萬計柰何任非其人白補平民為兵名募無法  
揀選云乎哉

廩祿之制為農者出租稅以養兵為兵者事征守以衛  
民其勢然也唐以天下之兵分置藩鎮天子府衛中外  
校卒不過十餘萬而國用不見其有餘宋懲五代之弊  
收天下甲兵數十萬悉萃京師而國用不見其不足者  
經制之有道出納之有節也國初太倉所儲纔支三二  
歲承平既久歲漕江淮粟六百萬石而縑帛貨貝齒革

百物之委不可勝用其後軍儲充溢常有餘羨内外乂  
安非偶然也凡上軍都校自捧日天武置龍衛神衛左  
右廂都指揮使遙領團練使者月俸錢百千粟五十斛  
諸班直都虞侯諸軍都指揮使遙領刺史者半之自餘  
諸班直將校自三十千至二千凡十二等諸軍將校自  
三十千至三百凡二十三等上者有僕廂軍將校自十  
五千至三百五十凡十七等有食鹽諸班直自五千至  
七百諸軍自一千至三百凡五等廂兵閱教者有月俸

錢五百至三百凡三等下者給漿菜錢或食鹽而已自班直而下將士月給糧率稱是為差春冬賜衣有絹綿或加紬布緡錢凡軍士邊外半分口券或折月糧或從別給其支軍食糧料院先進樣三司定倉教界分而以年月次之國初諸倉分給諸營營在國城西給糧于城東南北亦然相距有四十里者蓋恐士卒習惰使知負擔之勤久之有司乃取受輸年月界分以軍次高下給之凡三歲大祀有賜賚有優賜每歲寒食端午冬至有

特支特支有大小差亦有非時給者邊戍季加給銀鞍  
邠寧環慶緣邊難於釀汲者兩月一給薪水錢苦寒或  
賜絮襦袴役兵勞苦季給錢戍嶺南者增月奉自川廣  
戍還者別與裝錢川廣遞鋪卒或給時服錢屢屯兵州  
軍官賜錢宴犒將校謂之旬設舊止待屯泊禁軍其後  
及于本城天聖七年法寺裁定諸軍衣裝騎兵春冬衣  
各七事步兵春衣七事冬衣六事敢質賣者重寘之法  
景祐元年三司使程琳上疏論兵在精不在衆河北陝

西軍儲數匱而召募不已且住營一兵之費可給屯住  
三兵昔養萬兵者今三萬兵矣河北歲費芻糧千二十  
萬其賦入支十之三陝西歲費千五百萬其賦入支十  
之五自餘悉仰給京師自咸平逮今凡二邊所增馬步  
軍指揮百六十計騎兵一指揮所給歲約費緡錢四萬  
三千步兵所給歲約費緡錢三萬二千他給賜不預合  
新舊兵所費不啻千萬緡天地生財有限而用無紀極  
此國用所以日屈也今同華沿河州軍積粟至於紅腐

而不知用沿邊入中粟價常踊貴而未嘗足誠願河北  
陝西募住營兵勿復增置遇闕即遷廂軍精銳者補之  
仍漸徙營內郡以便糧餉無事時番戍于邊緩急即調  
發便近嚴戒封疆之臣毋得侵軼生事以覬恩賞違令  
者重賓之法如此則疆場無事而國用有餘矣帝嘉納  
之康定元年詔戰場士卒給奉終其身宰臣張士遜等  
言禁兵久戍邊其家在京師者或不能自給帝召內侍  
郎殿隅條軍校而下為數等特出內藏庫緝錢十萬賜

之慶歷五年詔湖南路發卒征蠻以給裝錢者毋得更  
予帶甲錢七年帝因閱軍糧諭倉官曰自今後當足數  
給之初有司以糧漕自江淮積年而後支惟上軍所給  
斗升僅足中下軍率十得八九而已嘉祐八年殿前諸  
班請糧比進樣異輒不受散去御史中丞王疇以為言  
詔提點倉官自今往檢視有不如樣同坐之軍士不時  
請及有誼譁悉從軍法皇祐二年詔在外禁軍凡郊賚  
折色並給以實估之直五年詔廣南捕蠻諸軍歲滿歸

營人賜錢二千月增奉錢二百度嶺陣亡及瘴癘物故者子孫或弟姪不以等樣收一人隸本營者支衣廩之半治平二年詔涇原勇毅軍揀為三等差給奉錢一千至五百為三等勿復置營以季集渭州按閱熙寧三年帝手詔倉使給軍糧例有虧減出軍之家侵牟益甚豈朕所以愛養將士意哉自今給糧毋損其數三司具為令於是嚴河倉乞取減刻之事四年詔付趙高聞鄜延路諸軍數出至鬻衣裝以自給可密體量振恤之先是

王安石言令士卒極窘至有衣紙而擐甲者此最為大憂而自來將帥不敢言振恤士卒恐成姑息以致兵驕臣愚以為親士卒如愛子故可與之俱死愛而不能令譬如騎子不可用也前陛下言郭進事臣案進傳言進知人疾苦所至人為立碑紀德士卒小有違令輒殺之惟其能犒賞存恤然後能殺違令者而人無怨今宜稍寬牽拘將帥之法使得用封椿錢物隨宜振恤然後可以責將帥得士卒死力也四年樞密院言不教閱廂軍

撥併各帶舊請外今後招到者並乞依本指揮新定請  
受河北崇勝河東雄猛陝西保寧京東奉化京西壯武  
淮南寧淮各醬菜錢一百月糧二石春衣絹二匹布半  
匹錢一千冬衣絹二匹紬半匹錢一千綿十二兩兩浙  
崇節江東西効勇荆南北宣節福建保節廣東西清化  
除醬菜錢不支外餘如六路川四路克寧巴上各小鐵  
錢一千糧二石春衣絹一匹小鐵錢十千冬衣絹一匹  
紬一匹綿八兩小鐵錢五千並從之七年增橋道清塞

雄勝諸軍奉滿三百又詔今後募禁軍等賞給並減舊  
兵之半十年詔安南道死戰沒者所假衣奉咸蠲除之  
弓箭手民兵義勇等有貸於官者展償限一年又中外  
禁軍有定額而三司及諸路歲給諸軍亦有常數其闕  
額未補者會其歲給並封樁樞密承旨司簿其餘數輒  
移用論如法元豐二年詔荆南雄畧軍十二營南戍漳  
漢者衆其議優恤之軍校子孫降授職有疾及不願為  
兵若無子孫者加賜緡錢軍士子孫弟姪收為兵並給

轉除籍後仍給糧兩月即父母年七十已上無子孫者  
給衣廩之半終其身哲宗即位悉依舊制徽宗崇寧四  
年詔諸軍料錢不多比聞支當十錢恐難分用自今可  
止給小平錢初蔡京謀逐王恩計不行欲陰結環衛及  
諸士卒乃奏皇城鋪兵月給食錢五百者日給一百五  
十自是每月頓增四貫三百欲因以市私恩也五年樞  
密院言自熙寧以來封椿隸樞密院比因創招廣勇崇  
捷崇武十萬人權撥封椿入尚書省緣禁軍見闕數多

若專責戶部及轉運司應副恐致誤事詔尚書省候極  
足十萬人外理合撥還自今應禁軍闕額封椿錢仍隸  
樞密院宣和七年詔國家養兵衣食豐足近歲以來官  
不守法侵奪者多若軍司乞取及因事率斂刻剥分數  
反致不足又官吏冗占猥多修造役使違法差借雜役  
之兵食浮於禁旅假借之卒後重於廂軍近因整緝軍  
政深駁聽聞自今違戾如前者重寘之法靖康元年詔  
諸路州軍二稅課利先行椿辦軍兵合支每月糧料春

衣冬賜數足方許別行支散官吏請給等禁軍月糧並  
免坐倉自國初以來內則三司外則漕臺率以軍儲為  
急務故錢糧支賜歲有定數至於征戍調發之時支將  
士功勞之犒賞與夫諸軍闕額而收其奉廩以為上供  
之封椿者雖無定數而未嘗無權衡於其間也封椿累  
朝皆有之而熙寧為盛其後雖有令後再不封椿之詔  
然軍司告乏則暫從其請稍或優足則封椿如舊蓋宰  
執得人則闕額用於朝廷樞筦勢重則闕額歸之密院

此政和軍政所以益不逮於崇寧大觀之間者由兩府之勢互有輕重而不能恪守祖宗之法也中興以後多尊舊制紹興四年御前軍器所言萬全雜役額五百戶部廩給有常法比申明裁減盡皆遁逃若依部所定月米五斗五升日不及二升麥四斗八升斗折錢二百日餐錢百實不足瞻詔戶部裁定月米一石七斗增作一石九斗五年詔効用入資舊法內公據甲頭名稱未正其改公據為守闕進勇副尉日餐錢二百五十米二升

甲頭為進勇副尉日餐錢二百米二升非帶甲入隊人  
自依舊法宣撫使韓世忠言本軍調發老幼隨行緣効  
用內有不調月糧不增給日請軍兵米二升半錢百効  
用米二升錢二百乞日增給贍米一升半庶幾戰士無  
家累後顧憂齊心用命詔分屯日即陳請十三年詔殿  
司諸統領將官無別供給職田日贍不足差兵營運浸  
壞軍政可與月支供給統制副統制月五百五十千統  
領官百千正將同正將五十千副將四十千準備將三

十千皆按月給既足其家可責後效若仍前差兵負販  
從私役禁軍法所販物計賊坐之必罰無赦州縣知而  
不舉同罪主管步軍司趙密言比定諸軍五等請給招  
填闕額要以屏革姦弊第數內招收自身効用填馬步  
軍使臣闕其五等請給例內馬軍効用依五人衙官例  
步軍効用依三人衙官例緣舊効用曾經帶甲出入日  
止餐錢二百米二升有少壯善射者既見初收効用廩  
給稍優因逃他軍以希厚請令擬五等招收自身効用

與舊効用不以馬步軍論槩增其給人日支錢二百米  
二升填使臣闕隆興二年殿前司言諸軍法兵級年六  
十將校年六十五減充剩員給請內有戰功亦止半給  
比來年及不與減落乞每營置籍鄉貫年甲招刺日月  
悉書之一留本營一留戶部一留總領以備開落乾道  
八年樞密院言二月為始諸軍七人例以上二分錢三  
分銀五分會子五人例三分錢四分銀三分會子軍兵  
折麥餐錢全支錢使臣折麥料錢統制軍佐供給分數

仍舊淳熙三年樞密院言兵部定請受格効用一資守  
闕毅士二資毅士三資守闕効士月各錢三千折麥錢  
七百二十米一石五升春冬衣絹各二匹四資効士錢  
三千折麥錢九百七十二米一石一斗三升有奇衣絹  
各二匹五資守闕聽候使喚錢四千五百折麥錢一千  
八十米一石二斗絹三匹有半六資聽候使喚錢四千  
五百折麥錢一千二百六十米一石四斗七升絹五匹  
七資守闕聽候差使八資聽候差使錢四千五百折麥

錢一千四百四十米一石六斗八升絹各五匹九資守  
關準備使喚十資準備差使錢五千折麥錢一千四百  
四十米六石八升絹各五匹紹熙元年知常德府王銖  
言沿邊城砦之官以備疆場不虞廩祿既薄給不以時  
孤寒小吏何以養廉致使熟視姦猾泄漏禁物公私庇  
蓋恬不加問從而徇私受賊者有矣弓手士軍戍卒傭  
直糧食累月不支迫於饑寒侵漁蠻獠小則致訟爭大  
則啟邊釁乞嚴勅州軍按月廩給如其未支守倅即不

得先請已奉庶俾城砦官兵有以存濟緩急之際得其  
宣力安邊弭盜莫此為急厥後弊日以滋迨至咸寧軍  
將往往虛立員以冒稍食以建康言之有神策二軍有  
游擊五軍有親兵二軍有制効二軍有靖安唐灣水軍  
有游擊采石水軍有精銳破敵軍有効用防江軍原其  
初起惟騎戎兩司額耳後乃各剏軍分額多而員少一  
統制月請以會子計之則成一萬五千推之他軍槩  
可見矣九年四川制司有言戎兵生券人月給會子六

千蜀郡物賈翔貴請增人月給九千當是時財賦之出  
有限廩稍之給無涯浚民膏血盡充邊費金帛悉歸于  
二三大將之私帑國用益竭而宋亡矣臣僚嘗言古者  
兵與農一官無供億之煩國有備禦之責後世兵與農  
二竭國力以養兵奉之若驕予用之若傭人今守邊急  
務非兵農合一不可其說者有二曰屯田曰民兵川蜀  
屯田為先民兵次之淮襄民兵為先屯田次之此足食  
足兵之良策也其言阨于權姦竟不行

宋史卷一百九十四

欽定四庫全書

會要卷五千八百二十三

史部

宋史卷一百九十五

元中書右丞相總裁托克托等修

兵志第一百四十八

兵九

訓練之制

訓練之制禁軍月奉五百以上皆日習武技三百以下或給役或習技其後別募廂兵亦閱習武技號教閱廂軍戍川廣者舊不訓練嘉祐以後稍習焉凡諸日習之

法以鼓聲為節騎兵五習步兵四習以其坐作進退非  
施於兩軍相當者然自宋初以來中外諸軍皆用之明  
道二年樞密使王曙言本廂下軍止給役而未嘗習武  
技宜取材勇者訓肄升補禁軍上可其奏康定元年帝  
御便殿閱諸軍陣法議者謂諸軍止教坐作進退雖整  
肅可觀然臨敵難用請自今遣官閱陣畢令解鎧以弓  
弩射營置弓三等自一石至八斗弩四等自二石八斗  
至二石五斗以次閱習詔行之陝西河東河北路是歲

詔教士不袵帶金革緩急不足以應敵自今諸軍各予  
鎧甲十馬甲五令迭披帶又命諸軍班聽習雜武技勿  
輒禁止慶歷元年徙邊兵不教者于內郡俟習武技即  
遣戍邊二年諸軍以射親疎為賞罰中的者免是月諸  
役仍籍其名閱校長則按籍取中多者補樞密直學士  
楊楷請教騎兵止射九斗至七斗三等弓畫的為五疊  
去的二十步引滿即發射中者視疊數給錢為賞騎兵  
佩臂陣刀訓練時以木桿代之奏可四年詔騎兵帶甲

射不能發矢者奪所乘馬與本營執優士卒韓琦言教射唯事體容及彊弓不習射親不可以臨陣臣至邊嘗定弓弩挽彊躡硬射親格願行諸軍立賞肆習歲以春秋二時各一閱諸營先上射親吏卒之數命近臣與殿前馬步軍司閱之其射親入第四至第七等量先給賜入第三等已上及挽彊躡硬中格悉引對親閱等數多者其正副指揮使亦第賜金帛詔以所定格班教諸軍四年遣官以陝西陣法分教河北軍士五年密詔益利

梓夔路鈐轄司以弓弩習士卒候民間觀聽寢熟卽便  
以短兵日教三十人十日一易知并州明鎬言近臣籍  
諸營武藝之卒使帶甲試克奇兵外為三等庶幾主將  
悉知軍中武技強弱臨敵可用詔頒其法三路范仲淹  
請以帶甲射一石克奇兵餘自九斗至七斗第為三等  
射力及等卽升之詔著為令六年詔諸軍夏三月母教  
弓弩止習短兵又詔以春秋大教弓射一石四斗弩彊  
三石八斗槍刀手勝二人者立為武藝出衆格中者本

營閱階級卽以次補至和元年詔諸軍選將校武藝鈞以射親為上韓琦又言奉詔軍士弩彊四石二斗并弓箭槍手應舊規選中者卽給挺補守闕押官然則排連舊制為虛文矣請三路兵遇春秋大教武技出衆者優給賞物免本營他役候階級閱如舊制選補奏可治平二年詔河北戰卒三十萬一千陝西四十五萬九百并義勇等委總管司訓練毋得冗占熙寧元年詔曰國家置兵以備戰守而主兵之官冗占者衆肄習弗時或誤

軍事帥臣安撫監司其察所部有占兵不如令者以聞  
十月樞密院請陝西河東選三班使臣及士人任殿侍  
者以為河北諸路指使教習騎軍或言河朔兵有教閱  
之名而無其實請班教法於其軍久而弗能者罷為廂  
軍奏可二年帝嘗語執政並邊訓練士卒何以得其精  
熟安石對曰京東所教兵已精強願陛下推此法以責  
邊將間詔其兵親臨閱試訓練簡閱有不如詔者罰之  
而賞其能者賞不遺賤罰不避貴則法行而將吏加勸

士卒無不奮勵矣九月選置指使巡教諸軍殿前司四人馬步軍司各三人三年帝親閱河東所教排手進退輕捷不畏矢石遂詔殿前司步軍指揮當出戍者內擇槍刀手伉健者百人教如河東法藝精者役使以優獎之五年四月詔在京殿前馬步諸軍巡教使臣並以春秋分行校試射命中者第賜銀牒兵房置籍考校以多少定殿最五月詔以涇原路蔡挺衙教陣隊於崇政殿引見仍頒諸路其法五伍為隊五隊為陣陣橫列騎兵

二隊亦五伍列之其出皆以鼓為節東草象人而射焉  
中者有賞馬步皆前三行槍刀後二行弓弩附隊以虎  
蹲弩床子弩各一射與擊刺迭出皆聞金卽退預籍人  
馬之彊者隱於隊中遇可用則別出為奇帝以其點閱  
周悉常有出野之備故令頒行六年詔河北四路承平  
日久重於改作苟遂因循益隳軍制其以京東武衛等  
六十二營隸屬諸路分番教習餘軍並分遣主兵官訓  
練九月詔自今巡教使臣校殿最雖以十分為率其事

藝第一等及九分已上或射親及四分雖殿除其罰第  
二等事藝及八分或射親不及三分雖最削其賞十月  
選涇原土兵之善射者以教河朔騎軍馳驟野戰帝曰  
裁併軍營凡省軍員四千餘人此十萬軍之資也儻訓  
練精勇人得其用不惟勝敵亦以省財安石等曰陛下  
頻年選擇使臣專務訓練間御便殿躬親試閱賞罰既  
明士卒皆奮觀其技藝之精一人為數夫之敵此實國  
家安危所繫也是時帝初置內教法旬一御便殿閱武

校程其能否而勸沮之士無不爭勸者七年詔教閱戰  
法主將度地之形隨宜施行二月詔自今歲一遣使按  
視五路安撫使以下及提舉教閱諸軍義勇保甲官課  
其優劣以聞而誅賞之八年詔在京諸軍營屯迫隘馬  
無所調習比叛四教場益寬大可以馳騁其令騎軍就  
教者日輪一營以馬走驟閱習五月減景陳馬射六事  
一順駿直射二背射三盤馬射四射親五野戰六輪弄  
各為說以曉射者詔依此教習八月帝令曾孝寬視教

營陣大閱八軍陣於荆家陂訖事大賞元豐元年十月  
詔立在京校試諸軍技藝格第為上中下三等步射六  
發而三中為一等二中為二等一中為三等馬射五發  
驟馬直射三矢背射二矢中數等如步射法弩射自六  
中至二中床子弩及砲自三中至一中為及等並賞銀  
有差槍刀并標排手角勝負計所勝第賞其弓弩墜落  
或縱矢不及堋或挽弓破體或局而不張或矢不滿或  
弩躡不上牙或摃不發或身倒足落並為不合格卽射

已中賞餘箭不合格者降一等無可降者罷之是月賈  
達燕達等言近者增損東南排弩隊法與東南所用兵  
械不同請止依東南隊法以弩手代小排若去敵稍遠  
則施箭近則左手持弩如小排架隔右手執刀以備斬  
伐與長兵相參為用詔可其槍手仍以標兼習十一月  
京西將劉元言馬軍教習不成請降步軍又不成降廂  
軍乃下令諸軍約一季不能學者如所請降之十二月  
詔開封府界京東西將兵十人以一人習馬射受教於

習馬射受教於教習馬軍所藝成則展轉分教於其軍  
二年四月遣內侍石得一閱視京西第五將所教馬軍  
五月得一言其教習無狀詔本將陳宗等具析宗等引  
罪帝責曰朝廷比以四方驕悍為可虞選置將臣分總  
禁旅俾時訓肄以待非常至於部勒規模悉經朕慮前  
後告戒已極周詳使宗等稍異木石亦宜畧知人意戶  
祿日久既頑且慵苟遂矜寬寔難勵衆可並勒停是月

詔殿前步軍司兵各置都教頭掌隸敎習之事弩手五營弓箭手十營鎗刀標排手五營各選一人武藝優者奏補逐司各舉散直二人為指使罷巡敎使臣是日詔河東陝西諸路舊制馬軍自十月一日馳射野戰至穀雨日止塞上地涼自今敎起八月止五月一日七月詔諸路敎閱禁軍毋過兩時九月內出敎法格并圖象頒行之步射執弓發天運手舉足移步及馬射馬使蕃槍馬上野戰格鬪步用標排皆有法象凡千餘言使軍士

誦習焉四年五月詔東南諸路轉運提點刑獄司體量  
將兵自降教閱新法之後軍士有所倍費以聞蓋自團  
立將兵以來軍人日新教閱舊資技藝以給私費者悉  
無暇爲故也六年從郭忠紹之請步軍弩手第一等者  
令兼習神臂弓七年八月詔開封府界京東西路專選  
監司提舉教閱神宗留心武備既命立武學校七書以  
訓武舉之士又頒兵法以肄軍旅微妙淵通取成于心  
羣臣莫望焉元祐元年四月右司諫蘇轍上言諸道禁

軍自置將以來日夜按習武藝將兵皆蚤晚兩教新募之士或終日不得休息今平居無事朝夕虞之以教閱使無遺力以治生事衣食殫盡憔悴無聊緩急安得其死力請使禁軍除新募未習之人其餘月止一教是月朝請郎任公裕言軍中誦習新法愚懵者頗以為苦夫射志於中而擊刺格鬪期於勝豈必盡能如法樞密院亦以為元降教閱新法自合教者指授不當令兵衆例誦詔從之九月樞密院奏異時馬軍教御陣外更教馬

射其法全隊馳馬皆重行為之字透空發矢可迭出最便利近歲專用順鬃直射扶鞍背射法止可輕騎挑戰即用衆乃不能重列非便請自今營閱排日馬軍之字射與立背射隔日互教詔可三年五月罷提舉教習馬軍所六年六月三衙申樞密院乞近狀七十日依令式放諸軍教王巖叟白韓忠彥曰景德故事皆內侍省檢舉傳宣今但歲舉為常則不復見朝廷恩意忠彥以為然又開陳太皇太后曰如此則為常事待處分內侍省

遂詔今後入狀遣中侍傳宣諸軍住教紹聖元年三月  
樞密院言禁軍春秋大教賞法每千人增取二百一十  
人給賞有差從之二年二月樞密院言馬軍自九月至  
三月每十日一次出城率演教習回答野戰走驟向背  
施放遇風雪假故權往從之三年五月詔在京府界諸  
路禁軍格鬪法自今並依元豐條法教習七月詔選弩  
手兼習神臂弓八月詔殿前馬步軍司見管教頭別選  
事藝精強通曉教像體法者展轉教習其弓箭手馬步

射射親用點藥包指及第二指知鏃並如元豐格法是  
月又詔復神臂弓射法為百二十步元符元年十月曾  
布既上巡教使臣罰格因言祖宗以來御將士常使恩  
歸人主而威令在管軍凡申嚴軍政豈待朝廷立法而  
後施行耶是管軍失職矣帝深以為然政和元年二月  
詔春秋大教諸軍弓弩斗力並依元豐舊制四年五月  
臣僚上言神臂弓垛遠百二十步給箭十隻取五中為  
合格軍中少得該賞恐惰於習射送殿前馬步軍司勘

會將中貼箭數並改為上塚其一中貼此兩上塚從之  
五年三月詔自今敢占留將兵不赴教閱並以違御筆  
論不按舉者如其罪十一月臣僚言春秋大教諸軍弓  
弩上取斗力高強其射親中多者激賞太薄無以為勸  
詔依元豐法八年詔州郡禁軍出戍外常留五分在州  
教閱從毛友之請也重和元年正月而兵部侍郎宇文  
粹中進對論禁軍訓練不精多充雜役帝曰祖宗軍旅  
之法最為密緻神考尤加意訓習近來兵官寢以弛慢

古者春振旅夏爰舍秋治兵冬大閱皆於農隙以講事  
大司馬教戰之法大宗伯大田之禮細論周制大抵軍  
旅之政六卿無有不總之者今士人作守倅任勸農事  
不以勸耕稼為職管軍府事不以督訓練為意自今如  
役使班直及禁衛者當差人捉探懲戒更候日長即親  
御教閱激賞尋以粹中所奏參照條令行之宣和三年  
四月立騎射賞法其背射上垛中貼者依步射法推賞  
靖康元年二月詔軍兵久教習汰冗濫令三衙與諸將

招軍惟務增數希賞但及等杖不問勇怯招收既不精  
當教習又不以時雜色占破十居三四今宜招兵之際  
精加揀擇既係軍籍專使教習不得以雜色拘占又神  
臂弓馬黃弩乃中國長技宜多行教習以扞邊騎仍令  
間用衣甲教閱庶使習熟四月詔復置教場春秋大閱  
及復內教法以激賞之如陣法熙寧二年十一月趙禹  
乞請求諸葛亮八陣法以授邊將使之應變詔郭逵同  
禹講求相度地形定為陣圖聞奏五年四月詔蔡挺先

進教閱陣圖帝嘗謂今之邊臣無知竒正之體者況奇正之變乎且天地五行之數不過五五陣之變出於自然非強為之宰相韓絳因請諸帥臣各具戰陣之法來上取其所長立以為法從之帝患諸將軍行無行陣之法嘗曰李靖結三人為隊必有意星書羽林皆以三人為隊靖深曉此非無據也乃令賈達郭固試之十二月知通遠軍王韶請降合行條約詔賜御製攻守圖行軍環珠武經總要神武祕畧風角集古四路戰守約束各

一部餘令關秦鳳路經畧司抄錄六年詔諸路經畧司  
結隊並依李靖法三人為一小隊九人為一中隊賞罰  
俟成序日取裁其隊伍及器甲之數依注原路牙教法  
九月趙高言欲自今大閱漢蕃陣隊且以萬二千五百  
人為法旌旗麾幟各隨方色戰國時大將之旗以龜為  
飾蓋取前列先知之義令中軍亦宜以龜為號其八隊  
旗別繪天地風雲龍虎鳥蛇天地則象其方圓風雲則  
狀其飛揚龍虎則狀其翔盤之勢以備大閱樞密院以

為陣隊旗號若繪八物應士衆難辨且其間亦有無形可繪者遂詔止依方色仍異其形制令勿雜而已七年又命呂惠卿曾孝寬比校三五結隊法十月以新定結隊法并賞罰格及置陣形勢等遣近侍李憲付趙高曰陣法之詳已令憲面諭今所圖止是一小陣卿其從容析問憲必一一有說然置陣法度又失其傳令朕一旦據意所得率爾為法恐有未盡宜無避忌但具奏來繼又詔曰近令李憲齋新定結隊法并賞罰格付卿同議

可否因以團立將官更置陣法卿必深悉朝廷經畫之意如日近可了宜令李憲齋赴闈禹奏曰置陣之法以結隊為先李靖以五十人為一隊每三人自相得者結為一小隊合三小隊為一中隊合五中隊為一大隊餘押官隊頭副隊頭左右僕旗五人即克五十並相依附今聖制每一大隊合五中隊五十人為之中隊合三小隊九人為之小隊合三人為之亦擇心意相得者又選壯勇善槍者一人為旗頭令自擇如已藝心相得者二

人為左右僕自選勇悍者一人為引戰又選軍校一人執刀在後為擁隊凡隊內一人用命二人應援小隊用命中隊應援中隊用命大隊應援大隊用命小隊應援如通撓觀望不即赴救致有陷失者本隊委擁軍校次隊委本轄隊將審觀不救所由斬之其有不可救或赴救不及或身自受敵體被重創但非可救者皆不坐其說雖與古同而用法尤為精密此蓋陛下天錫勇智不學而能也然議者謂四十五人而一長不若五人而一

長之密且以五人而一長即五十人而十長也推之於  
百千萬則為長者多而統制不一也至如周制五人為  
伍屬之比長五伍為兩屬之間胥四兩為卒屬之族師  
五卒為旅屬之黨正五旅為師屬之州長五師為軍屬  
之命卿此猶今之軍制百人為都五都為營五營為軍  
十軍為廂自廂都指揮使而下各有節級有員品亦昔  
之比長閭胥族師黨正之任也議曰謂什伍之制於都  
法為便然都法恐非臨陣對敵決勝之術也况八陣之

法久失其傳聖制一新稽之前聞若合符節夫法一定易以致人敵好擊虛吾以虛形之敵好背實吾以實形之然而所擊者非其虛所背者非其實故逸能勞之飽能饑之此所謂致人而不致於人也七年七月詔諸路安撫使各具可用陣隊法及訪求知陣隊法者以聞九月崇儀使郭固以同詳定古今陣法賜對於是內出攻守圖二十五部付河北八年二月帝批見校試七軍營陣以分數不齊前後抵牾難為施用可令見校試官撫

其可取者草定八軍法以聞初詔樞密院曰唐李靖兵  
法世無全書雜見通典離析譌舛又官號物名與今稱  
謂不同武人將佐多不能通其意令樞密院檢詳官與  
王振曾收王白郭逢原等校正分類解釋令今可行又  
命樞密院副都承旨張誠一入內押班李憲與振逢原  
行視寬廣用馬步軍二千八百人教李靖營陣法以步  
軍副都指揮使楊遂為都大提舉誠一憲為同提舉振  
逢原參議公事夏元象臧景等為將副部隊將幹當公

事凡三十九人誠一等初用李靖六花陣法約受兵二萬人為率為七軍內虞候軍各二千八百人取戰兵千九百人為七十六隊戰兵內每軍弩手三百弓手三百為軍五百跳盪四百奇兵四百輜重每軍九百是為二千八百人帝諭近臣曰黃帝始置八陣法敗蚩尤於涿鹿諸葛亮造八陣圖於魚復平沙之上壘石為八行晉桓溫見之曰常山蛇勢此即九軍陣法也至隋韓擒虎深明其法以授其甥李靖靖以時遇亂將臣通曉者

頗多故造六花陣以變九軍之法使世人不能曉之大抵八陣即九軍九軍者方陣也六花陣即七軍七軍者圓陣也蓋陣以圓為體方陣者內圓而外方圓陣即內外俱圓矣故以方圓物驗之則方以八包一圓以六包一此九軍六花陣之大體也六軍者左右虞候軍各二為二虞候軍左右廂各二為四廂軍與中軍共為七軍八陣者加前後二軍共為九軍開國以來置殿前馬步軍三帥卽中軍前後軍帥之別名而馬步軍都虞候是

為二虞候軍天武捧日龍神衛四廂是為四廂軍也中軍帥總制九軍即殿前都虞候專總中軍一軍之事務是其名實與古九軍及六花陣相符而不少差也今論兵者俱以唐李筌太白陰經中陣圖為法失之遠矣朕嘗覽近日臣僚所獻陣圖皆妄相眩惑無一可取果如其說則兩敵相遇必須遣使豫約戰日擇寬平之地夷草塞壑誅草伐木如射圃教塲方可盡其法爾以理推之其不可用決矣今可約李靖法為九軍營陣之制然

李筌圖乃營法非陣法也朕採古之法酌今之宜曰營  
曰陣本出于一法特止曰營行曰陣在奇正言之則營  
為正陣為奇也於是以八月大閱八軍陣於城南荆家  
陂已事賜遂而下至指使馬步軍銀絹有差八年詔諸  
路權住教五軍陣止教四御陣九年四月帝與輔臣論  
營陣法謂為將者少知將兵之理且八軍六軍皆大將  
居中大將壁則心也諸軍四體也運其心智以身使臂  
以臂使指攻左則右救攻右則左救前後亦然則軍何

由敗也元豐四年以九軍法一軍營陣按閱於城南好  
草陂已事獎諭熙寧七年詔已降五陣法令諸將教習  
其舊教陣法並罷蓋九軍營陣為方圓曲直銳凡五變  
是為五陣元祐元年高翔言乞以御陣與新陣法相兼  
教閱從之蓋元豐七年詔專用五陣法而舊教御陣遂  
廢至是復令互教紹聖三年復罷教御陣大觀二年詔  
以五陣法頒行諸路靖康元年監察御史胡舜陟奏通  
直郎秦元所著兵書陣圖師律三策大八陣圖一小圖

二皆酌古之法參今之宜博而知要實為可用詔令賜  
對當時君臣雖無雄謀遠畧然猶切切焉以經武為心  
高宗建炎元年始頒樞密院教閱法專習制御推鋒破  
敵之藝全副執帶出入短樛神臂弓長柄刀馬射穿甲  
木挺每歲擬春秋教閱法立新格神臂弓日給箭二十  
射親去梁百二十步刀長丈二尺以上氈皮裹之引斷  
五十二次不令刀頭至地每營選二十人閱習經兩閱  
者五十人為一隊教習分合隨隊多少分隸五軍每軍

各置旗號前軍緋旗飛鳥為號後軍皂旗鼈為號左軍青旗蛟為號右軍白旗虎為號中軍黃旗神人為號又別以五色物號制招旗分旗舉招旗則五軍以旗相應合而成陣舉分旗則五軍以旗相應分而成隊左右前却或分藏為伏或分出為奇皆舉旗為號更鳴小金應鼓備瞻望不及者豫約伏藏之所緩鳴小金即止急鳴應鼓即奇兵出陣趨戰急鳴小金即伏兵出其春秋大教推賞依海行格法李綱言水戰之利南方所宜沿河

淮海江帥府要郡宜倣古制造戰船以運轉輕捷安穩  
為良又習火攻以焚敵舟詔命楊觀復往江浙措置河  
淮別委官三年親閱水軍于鎮江登雲門外紹興四年  
詔內殿按閱神武中軍官兵推賞二十四年臣僚言州  
郡禁卒遠方縱弛多不訓練春秋教閱臨時備數乞申  
嚴舊制三十一年詔比聞諸路州廂禁軍土軍有司擅  
私役妨教閱帥府其嚴責守兵勤兵歸營訓練精熟以  
備點視孝宗乾道二年幸候潮門外次幸白石閱兵三

衛率將佐道駕射至官兵就御輦下獻所獲是日有數  
將獨手運大刀上曰刀重幾何李舜舉奏刀皆重數斤  
有旨卿等教閱精明又諭陳敏曰軍馬衣裝整肅如此  
特錫賚鞭馬金帶士卒推賞有差四年幸茅灘教閱舉  
黃旗連三鼓變方陣五鼓舉白旗變圓陣次二鼓舉赤  
旗變銳陣青旗變直陣畢事上大悅賞賚加倍兵分東  
西呈大刀火砲上問李舜舉按閱比曩時如何舜舉奏  
今日之兵陛下親訓練撫以深恩錫以重賞忠勇倍常

乾道中詔弓箭手元射一石四斗力升加三斗元射一  
石力升加五斗弩手元射四石力升加五斗元射兩石  
七斗力升加八斗進秩推賞有差宰執進射親賞格虞  
允文曰拍試以斗力升請給今用射親定賞恐不加意  
斗力上曰然他日雖強弓弩可以取勝若止習射親則  
斗力不進此賞格不湏行淳熙間立槍手及射鐵簾格  
上謂輔臣曰聞射鐵簾諸軍鼓躍奮厲周必大曰兵久  
不用此輩無進取自然氣惰今陛下激勸告戒人人皆

勝兵於是殿前步軍司諸軍及馬軍舊司弓弩手射鐵  
簾合格兵共一千八百四十餘詔中槩簾弓箭手一石  
二斗力十箭弩手四石力八箭依格進兩秩各賜錢百  
緡弓箭手一石力十箭以上弩手三石力八箭各進兩  
秩詔中外諸軍賞格亦如之紹熙元年詔殿司許浦水  
軍并江上水軍歲春秋兩教外每月輪閱習沿海水軍  
準是知徽州徐誼言諸路禁軍近法以十分為率二分  
習弓六分習弩餘二分習槍牌習弓者聽兼習弩斗力

可以觀其進退射貌可以察其能否勤惰之實人有稽  
考詔下諸路遵守之執政胡晉臣言比年用射鐵鏹廉推  
賞往往獲遷秩是亦足以作成人才上曰射鐵鏹廉不難  
此賞格太濫其專以武藝精熟為尚二年樞密院言殿  
步司諸軍弓箭手帶甲六十步射一石二斗力箭十二  
六箭中垛為本等弩手帶甲百步射四石力箭十二五  
箭中垛為本等槍手駐足舉手攬刺以四十攬為本等  
主帥委統制統領較其藝本等外取升加多者每軍五

千五百人以上弓弩槍手各十五人詣主帥審實上樞  
密院覆試各擇優等二人升轉兩秩餘人給錢五緡俟  
將來再試慶元二年辛候潮門外大閱嘉泰二年詔將  
按閱諸軍賞賚依慶元二年增給寶慶二年莫澤言州  
郡禁軍平時則以防寇盜有事則以備戎行實錄於朝  
廷非州郡可得私役比年州郡軍政墮廢各於廩給闕  
額恒多郡官主兵官有窠占寓公有借事存留者不什  
一當教閱時鈐總路分雖號主兵僅守虛籍莫敢號召

入教之次坐作進退殆同兒戲守臣利虛券不招填主  
兵受厚賂改年甲且一兵請給歲不下百緡以小計之  
一郡占三百人是虛費三萬緡也私役禁軍素有常憲  
守帥闢園池建第宅不給餐錢寓公去城遼絕類得借  
兵擾害鄉間近而輔郡至有寓公占四五百兵者良由  
兵官之權輕而私占之禁弛也乞嚴戒監司守倅等止  
許借廂軍仍不得妨教閱餘官雖廂軍亦勿借淳祐十  
一年臺臣條陳軍匠不閑閱習之弊按舊制禁兵毋私

役比歲凡州軍屯營駐劄之處多循舊習每一州軍匠無慮數百官無小大各戰破而雕鏤組繡攻金設色之事靡所不有工藝雖精擊刺不習設有小警何能授甲乞申嚴帥守及統兵官應軍近聽歸營伍閑習訓練勿競作兵益虛糜廩稍以防軍實咸淳初臣僚言諸軍統領統制正將副將正欲在軍訓練閑於武事一有調用令下即行士悉將智將悉士勇所向無敵今江南州郡沿江制閫置帳前官專任營運不為軍計實為家謀絕

無戰陣新功率從帳前升差大畧一軍僅二三千而使  
臣至五六百以供雜役九年臣僚言比者招募軍兵一  
時徒取充數以觀賞格涅刺之後更不教閱主兵官苦  
以勞役日夜罔休一或少違即罹罔榜掠之酷兵不  
堪命而死者逃者接踵也今請以新招軍分隸諸隊使  
之熟紀律習事藝或旬或月上各郡閱試蓋弊至於此  
而訓練之制大壞矣

宋史卷一百九十五

謹案卷一百九十五第十一頁前六行而兵部侍

郎宇文粹中進對按而字疑衍





總校官庶吉士臣張能照  
校對官庶吉士臣嚴福

謄錄監生臣王應璧

謄錄監生臣顧振

欽定四庫全書會要

史部

宋史卷一百九十六

詳校官編修臣王天祿



欽定四庫全書會要卷五千八百二十四

史部

宋史卷一百九十六

元中書右丞相總裁托克托等修

兵志第一百四十九

兵十

遷補之制  
屯戍之制

遷補之制自殿前侍衛馬步軍校每遇大禮後各以次  
遷謂之轉員轉員至軍都指揮使又遷則遙領刺史又  
遷為廂都指揮使遙領團練使員溢即從上罷軍職為

正團練使刺史之本任或有他州總管鉤轄其老疾若  
過失者為御前忠佐馬軍都軍頭副軍頭隸軍頭司其  
黜則為外州馬步軍都指揮使凡軍主闕以軍都指揮  
使遞遷餘闕以諸軍都虞候指揮使副指揮使行首軍  
使副行首副兵馬使十將遞遷凡將校一軍營止補十  
人其廂都指揮使軍都指揮使都虞候指揮使營主其  
一即關其三殿前左右班都虞候遙領刺史即與捧日  
軍都指揮使通以次遞捧日龍衛廂都指揮使仍遙領

團練使若員滿即為正刺史補外他如諸軍例遞遷凡  
列校轉補有司先闕走躍上下馬次出指二十步掩一  
目試之左右各五占數為見物武藝弓射五斗弩彊一  
石五斗槍刀手稍練負罪不至徒年未高或雖年高而  
無疾精力不耗者竝取之凡諸軍轉員後取殿前指揮  
使長入祇候填行門取東西班長入祇候殿侍諸班直  
充諸班押班諸軍將校者皆親閱前一日命入內都知  
或押班一人勾當御藥院內侍一人同軍頭引見司較

定弓弩斗力標誌之凡弓弩藝等者人占其一至日引見弓弩列置殿前命取一以射軍頭引見司專視喝箭以奏如喝失當即奏改正入內都知或押班同勾當御藥院內侍殿上察視如引見司不覺舉亦奏改正槍刀手喝勝負若喝不以實并引見司失覺舉並劾其罪太平興國九年上詣崇政殿轉改諸軍將校自軍都指揮使以下員僚以上皆按名籍驗勞績而升陟之凡數日而畢內外感悅乃謂宰臣等曰朕遷轉軍員先取其循

謹能御下者武勇次之若不自謹飭則其下不畏憚雖  
有一夫之勇亦何所用咸平三年五月上御便殿遷補  
軍職凡十一日而畢自神衛右第二軍都指揮使恩州  
刺史周訓而下遞遷者千三十一人四年十二月帝謂  
呂蒙正曰選衆求才誠非易事朕常孜孜詢訪冀有所  
得向求於軍校中超擢八九人委以方任其間王能魏  
能頗甚宣力陳興張禹珪亦有能名蒙正等曰才難求  
備今拔十得五有以見陛下知臣之明也五年帝謂知

樞密院周瑩曰國朝之制軍員有闕但權領之三歲一遷補未及期以功而授止奉朝請而已今闕員處則乏人部轄須當例與轉補於是召瑩等至便殿按軍籍次補具屯戍於外及軍額在下素不該恩例亦溥及之凡再旬方畢景德二年四月帝曰殿前諸班侍衛馬步諸軍及軍頭司諸軍員因衰病或以他事出補外職率皆臨事奏裁殊無定制可條其所入職名類例以聞又曰近累有諸處立功指揮使未可別加遷擢皆特補本軍

都虞候舊無此職名蓋權宜加置若後有闕不須復補  
又曰內外諸軍所闕小校儻以名次遷補或慮不能盡  
得武幹之士自今並令閱試武藝遷擢為之大中祥符  
四年七月詔曰自來轉補軍員皆是議定降宣命訖方  
引見轉補其間有老病不任職者臨時易之無由整齊  
經汾陰大禮應殿前馬步軍諸班諸軍員並分作甲次  
於崇政殿逐人唱名引見朕自視之有不任職者當於  
不係禁軍處優與安排免轉員之際旋議改易八月詔

殿前侍衛馬軍步軍司所管內外禁軍軍員自來補轉體例不一未得均平朕夙夜思之今來該汾陰轉員可立定久遠規制其馬軍步軍自指揮使以下各別轉補皆令自下而升仍將殿前侍衛馬軍步軍司所轄軍分各衆同轉補如馬軍軍員自近下補至拱聖即雙取之以分補捧日龍衛其近下軍分有闕即却自捧日龍衛雙取升一員資補填其步軍有闕填補竝準此又詔所議改更轉補軍員職名恐諸軍未喻可降宣命云殿前

侍衛馬步軍司自來多是龍衛更轉入捧日并神衛更入天武之類是致難得出職久成沈滯今來轉員出自朕意並各與分兩頭遷改其龍衛更不入捧日并神衛更不入天武其捧日龍衛闕於拱聖內隔間取人分頭充填其拱聖闕即將驍騎雲騎分頭轉入其天武神衛闕於神勇內隔間取人分頭充填其神勇闕即將宣武充填其宣武闕取殿前步軍司虎翼充填已上如取盡指定軍員即轉已次軍員充填所有寧朔軍分次第請

受并轉員出入今後竝特與依驍勝體例施行六年十月詔諸班直并馬步軍事軍員其諸班捧日龍衛天武神衛五頭下出入外其御龍諸直作一處轉員僚直拱聖驍騎雲騎驍勝武騎寧朔神騎已上軍額軍員作一處挨排遞遷水軍神勇宣武殿前司虎翼衛聖步軍司虎翼奉節廣勇神射已上軍額軍員作一處挨排轉補事內殿前指揮使押班至都知只本班轉其神衛廣勇神射已下至軍使都頭即逐指揮內遞遷內有年及六

十已下者並勾押赴關令殿前司看驗聞奏當議相度  
安排所有副兵馬使副都頭員闕仍取捧日龍衛神勇  
十將充填餘並從之內神衛水軍第一指揮令立充神  
衛水軍指揮殿前司上虎翼第二步軍司上虎翼第一  
並立充虎翼水軍指揮依舊係逐司管押其神衛水軍  
見管軍員先自奉節補入多不會舟楫並一齊轉上外  
却將虎翼水軍兩指揮會水軍員與神衛水軍共三指  
揮一處袞轉如轉至神衛水軍指揮使除年老病患依

例出職安排外更不轉上天禧元年十月以御前忠佐  
郭豐等六人竝受將軍初軍頭司定年老負犯者將黜  
之帝以其久居武列命寘環衛其帶遙郡者與大將軍  
不帶遙郡者與將軍天聖六年將轉員樞密院奏諸軍  
將校有因循不敢戢士者請諭殿前馬步軍司密以名  
聞八年詔殿前侍衛司同定內外諸軍排立資次景祐  
二年詔緣邊就糧兵有員闕奏以舊人次遷康定元年  
詔三路就糧將校半以次遷半遣自京師又詔陝西土

兵校長遣自京師情不諳達自今悉就本路通補慶歷  
四年詔捧日天武選退將校超三資餘超二資悉補外  
職五年真定府定州路都總管司奏奉詔閱教軍士選  
補階級弓射九斗至一石距堋七十步至百步射最親  
者為第一等其閱教時弓不必引滿力競即發務在必  
中伏緣舊例軍中揀節級以挽彊引滿為勝今一旦取  
射親者為第一等其弓力止九斗一石箭留三兩指而  
退素習挽強引滿之士於理未便詔諸軍選節級用舊

例遇閱教即如近制皇祐元年詔諸路就糧兵閱將校須轉補滿三年聽遷又詔將帥麾下兵非有戰功毋得請遷隸上軍嘉祐二年詔京東敎閱本城騎射威邊威勇壯武自初募置即給鼓旗閱敎以代禁軍如有員閱聽遞遷至副指揮使止轉補後滿三歲闕三分已上即舉行其指揮使闕即步軍司補之至和三年詔親從官入殿滿八年者補節級從樞密院之請也治平元年選諸班直長行洎禁軍副兵馬使已上有材武者得七十

人帝臨軒親閱諭天武右第三軍都指揮使王秀曰爾  
武藝雖不中格而有戰功且能恪守法度其以爾為正  
刺史務勤乃職無負朕之委寄也又諭散直都虞候胡  
從內殿直副都知張思曰爾能勤以持身忠以事上治  
軍又皆整肅其以從為內園使思為崇儀副使自餘擢  
遷有差二年詔廣南敎閱忠敢澄海一營者即本營遞  
遷兩營已上者營三百人補五人二百人至三百人補  
三人二百人以下補二人百人以下補一人止於副指

揮使凡遞遷補三歲五階闕二三階闕一即補四年詔  
自今一營及二百五十人已上置校十人闕三人即補  
二百五十人已下置校七人闕二人即補京師非轉員  
并諸道就糧並準此令凡軍頭十將節級轉補謂之排  
連有司按籍閱試如列校轉員法弓射六斗弩彊一石  
七斗槍刀手稍練並取之如舊不試武技者即遞遷其  
不敎閱廂軍節級則其半遞遷其半取伉健未嘗犯徒  
刑角力勝者充治平四年有司言軍士闕額多而將校

衆請以實領兵數制將校額第其遷補竝通領五都之事乃詔二百五十人以上補指揮使十人以下七人闕二人者以次補補十將者馬軍四十人步軍如馬軍之數而加其一焉百五十人以上者三十人闕五人者以次補不及百五十人者如舊格補單將二十人熙寧二年樞密院請自今捧日龍衛天武神衛廂都指揮使闕無當次遷者竝虛之其諸軍都指揮使都虞候當遷者闕多則間一名補轉兼以次職事吐渾等軍都指揮使

都虞候闕者虛其闕六月詔河東陝西就糧軍士將校  
其間材効之人孤遠無由自達有司審度其有軍功驍  
勇者以名聞當擢實班行以備本路任使四年詔諸班  
直嘗備宿衛病告滿尚可療者殿前指揮使補外牢城  
指揮使餘以為捧日天武第五軍押營奉錢三千者予  
五百二十以下者予三百六年詔軍校老而諳部轄者  
優假之雖疾不至罷癃或未七十猶堪任事者勿罷即  
法雖當留而不能部轄者以聞當議處之廂軍十月詔

軍士選為節級取兩嘗有功者功等以先後又等以重輕又等以傷多者為上七年詔十將以下當轉資而不欲者凡一資以功者賜帛五十匹技優者十五六月詔在京轉員諸軍都虞候已上至軍都指揮使以軍功當遷而願以授予孫者聽視其秩有差八年轉員帝親閱凡三日舊制捧日都虞候四人至是補者五人而馬軍都指揮使闕驍騎二人以捧日一人補驍騎軍主餘四人如故則次軍皆不得遷乃補四人者皆為馬步軍副

都軍頭舊龍衛拱聖驍騎武騎寧朔神騎為一百三十  
一營今省為五十營而馬軍指揮以下已補八十一營  
補外尚有溢員乃詔所省營未移併者凡四十三每營  
權置下名指揮使副指揮使各一軍使三以便遞遷九  
年將轉員樞密院奏換官稍優軍校由行伍有功不久  
乃至團練使帝曰祖宗以來軍制固有意凡隸在京殿  
前馬步軍司所統諸營置軍都指揮使都虞候分領之  
凡軍事止責分領節制之人責之既嚴則遇之不得不

優至若諸路則軍校不過各領一營不可比也吳充等  
以本大末小對帝然之因言周室雖盛成康之後寢以  
衰微本朝太平百有餘年由祖宗法度具在豈可輕改  
也元豐元年詔禁軍排連者三分其人以其一取立功  
額外人二分如今簡試十二月詔諸軍軍使都頭以下  
竝充兵額正副指揮使以上置於額外軍行則分押諸  
隊又詔內殿直以下諸班直闕按籍闕二分者虛其闕  
四之一二分以上亦如之不及二分補其半餘竝闕之

四年詔五路袞轉土軍與諸路不袞轉禁軍法十將副都頭副兵馬使都軍頭使並如令自副都指揮使至都虞候嘗轉資者間以賜帛已賜帛乃遷五年詔以諸路教閱廂軍為下禁軍排連如禁軍法七年樞密院言騎軍諸營諸班直以年勞升至軍使者甚衆無闕可補詔捧日龍衛拱聖驍騎雲騎驍勝權置下名軍使凡四百四十員拱聖驍騎雲騎權置副兵馬使凡九十員以處之元祐元年樞密院奏諸軍將年七十若有疾假滿百

日不堪療者諸廂軍指揮使除諸衛大將軍致仕諸軍  
都指揮使諸班直都虞候帶遙郡除諸衛將軍致仕諸  
班直上四軍除屯衛拱聖以下除領軍衛仍竝以有功  
勞者為左無功勞者為右從之二年樞密院言舊例行  
門對御呈試武藝並臨時特旨推恩前期未嘗按試至  
日旋乞增加斗力或涉唐突因以抵罪請於轉員前一  
日按定斗力從之四月樞密院言舊例諸班直長行補  
諸軍員僚竝取入班及轉班二十年年四十以上人迨

元豐四年以闕額數多乃特詔減五年繫一時之命令  
諸軍員僚溢額儻不定制即異時遷補不行若便依限  
舊例年限從之五年樞密院言轉員馬軍指揮使以下  
至副兵馬使人數溢額轉遷不行詔權置下名軍使一  
百七十人副兵馬使一百七十五人又言禁軍大閱請  
以匹帛銀牒支賜罷轉資從之六年又言應排連長行  
充承局押官者先取年五十五以下有戰功公據者仍

以戰功多少得功先後傷中輕重為次事等而俱無傷  
中則以事藝營名為次從之紹聖二年詔將來轉員換  
前班人並從元豐轉員令仍不得過一百二十人元祐  
所限人數比試家狀指揮勿用三年樞密院進呈轉員  
及行門試武藝換前班留住等條例曾布言國初以來  
皆面問其所欲察相人才或換官或遷將校或再任此  
則威福在人主以至唐突或放罪或行法亦視其情狀  
而操縱之元祐改法乃令大閣與三司軍頭司先指試

定但對御引呈依拍定等第推恩殊失祖宗馭衆之法  
不許唐突例坐徒罪兼決責人員皆非舊法唐突人雖  
有理亦不施行緣情輕者放罪重者取旨自有舊額先  
朝燕達林廣嘗唐突當降配先帝釋之後皆為名將至  
情重則杖脊配嶺表者有王明者住留呌呼云若不得  
換前班乞納命管軍賈達乞重配先帝亦貸之但降一  
等與換外官如此故人知恩威皆自人主出豈可一切  
付之有司帝悅詔令竝依元豐以前條例施行五年馬

步軍司言三路袞轉軍員請依元豐七年詔應三月一日後續有得功嵌補升名并改轉名職自充下名者並依先補名次各理降宣月日以為高下審會給據候再經袞轉即依嵌補升轉名次高下轉那自今三路軍員袞轉亦如之詔侍衛馬步軍司自今開具合轉補職名申樞密院降宣餘並從之七月軍頭司引見殿前馬步軍司揀到御龍諸直人材事藝應格並補逐直都虞候賜杖子一名開弓偃身不應法黜之八月樞密院言轉

員旁通格捧日天武不帶遙刺軍都指揮使換左藏庫使仍除遙刺殿前班不帶遙刺都虞候換左藏庫使看詳殿前班帶遙郡都虞候係與捧日帶遙郡軍都指揮使理先後相壓轉遷具不帶遙郡殿前班都虞候捧日軍都指揮使換官班合一等推恩欲殿前班不帶遙郡都虞候依捧日不帶遙郡軍都指揮使換官又拱聖神勇與驍騎已下軍分有異其逐軍都虞候指揮使理難一等換官欲拱聖神勇都虞候依舊換拱備庫使外驍

騎雲騎宣武都虞候換左藏庫副使拱聖神勇指揮使  
換內殿承制捧日天武神龍衛指揮使皆係上四軍其  
捧日天武換西京左藏庫副使龍神衛換內殿承制比  
捧日天武隔兩官理有未均欲神龍衛指揮使換供備  
庫副使又殿前班上名副都知換供備庫副使下名副  
都知換內殿承制自來以左右第一第二班為資次欲  
第一班換供備庫副使第二班換內殿承制又換前班  
差遣州總管以下竝以五路緣邊為優諸路為次正團

練使州總管正刺史州鉢轄諸司使副都巡檢使駐泊  
都監內殿承制崇班巡檢州都監供奉官至借職教押  
軍隊指使看詳諸司使副已上差遣見依格施行外承  
制以下欲依今來轉員所差遣例又拱聖神勇驍騎雲  
騎宣武軍都指揮使換文思仍除遙刺已帶者依舊御  
龍直都虞候文思使帶遙刺者依舊內殿直兩次都虞  
候換左藏庫使一次文思使帶遙刺者依舊看詳拱聖  
神勇與驍騎以下軍分有異兼御龍直都虞候遇轉員

合次神勇軍都指揮使轉行及係環衛諸直人員最上  
名人兼內殿直都虞候以次殿前班及轉員無闕合隨  
龍衛軍都指揮使轉行理難於驍騎雲騎宣武軍都指  
揮使之下換官欲御龍直內殿直都虞候依格合換官  
外竝除遙刺驍騎雲騎宣武軍都指揮使止與換文思  
使更不除遙郡刺史內已帶遙刺者竝依舊內殿前班  
副都知竝與換供備庫副使今馬步軍諸指揮事藝高  
彊十將引見取揀充員僚內弓箭手短一指箭人合降

一軍安排弩手括不發事體頗同并弩手墮箭與括不  
發亦同欲竝降一軍安排從之十一月樞密院言轉員  
旁通冊內御龍直都虞候至副都頭換官惟指揮使上  
兩直與文思副使係降兩資餘止降一資散員至金槍  
都知副都知皆換內殿承制不惟職名有差自副都知  
約六遷方轉都知兼東西班散直鈞容直係近下班分  
副都知亦降都知一等換內殿崇班其東西班散直押  
班與副都知職名不等兩經轉遷方入近下班分副都

知理難與都知一等換內殿崇班又散指揮至鈞容直  
指揮使竝換供備庫副使緣東西班散直鈞容直遇轉  
員止是遷入上班亦難一等換官詔御龍下兩直指揮  
使換左藏庫副使散員散指揮散都頭散祇候金槍都  
知換供備庫副使東西班散直押班換東頭供奉官東  
西班指揮使換官依舊外散直鈞容直指揮使換左藏  
庫副使緣轉員旁通冊內未載雲武騎軍都指揮使轉  
遷換官并恩例等詔竝依驍騎軍都指揮使格四年二

月軍頭司引見捧日等兵試藝帝於行間召邢斌韓辰  
問曰開弓猶有餘力乎各對願增二石二斗弓遣內侍  
監定斗力授之射皆應法竝特充殿前指揮使賜緺錢  
元符元年七月樞密院言將校軍頭十將各轉補者委  
本將體量不掩眼試五次二十步見若一次不同減五  
步掩一眼再試但兩眼共見二十步或一眼全不見二  
十步仍試上下馬如無病切弓射五斗弩踏一石五斗  
槍刀標牌手各不至生疎竝與轉補即有病切或精神

延卒或將校年六十九或經轉補後犯姦盜贓罪情罪  
重以上雖該降竝隔下奏聽旨如差出者勾赴本將體  
量在別州者報所在州體量排連長行充承局押官者  
先取年五十五以下有兩次以上戰功人填闕六人更  
取一名餘取年四十以下武藝高彊無病切人試兩眼  
各五次二十步見者選拍內步軍以關六分為率先取  
弓手一分次取弩手三分次取槍牌刀手二分更有零  
分者依六分為率資次取揀周而復始長行犯徒經決

及二年或軍人因犯移配杖罪經三年徒罪經四年或已升揀軍分又經一年各無過犯並聽排連不應充軍人已投狀後審會取放逐便雖未給公憑其請給差使並罷有違犯加凡人二等不應充軍人於法許逐便者並追納元請投軍例物訖報合屬去處給公憑放逐便如非品官之家無例物回納願依舊充軍者聽從之三月禮部言檢會故事臣僚申請諸州軍府管押進奉衙校等祖宗以來並加散官自更官制階散並罷既罷階

散若與轉資似屬太優欲每轉一資支賜絹一十足如  
一名管押兩處只許就一處支給或一州一軍差二人  
同押亦共與上件支賜若一員官兩處進奉只隨本官  
合推恩處從一支給今押進奉皇帝登寶位禮物衙校  
等欲依故例施行並從之宣和七年十一月南郊制應  
軍員送軍頭司未得與差遣者如後來別無過犯却與  
差遣應廂軍人員補職及十五年未經遷補者令所屬  
保明聞奏應禁軍廂軍因一犯濫情重不得補充人員

及遞遷資給者若經斷及五年不曾再犯及不曾犯贓  
委所在候排連日審實特與不礙遷補建炎紹興之間  
排連轉員屢嘗損益而大率因於舊制乾道六年主管  
侍衛馬軍司公事李顯忠言本司諸兵將官有闕自來  
擇衆所推者不以次序上聞升遷比年須自訓練官充  
準備將準備將及二年升副將副將及二年升正將正  
將及三年升統領官再及三年升統制官竊恐無以激  
揚士氣請今后兵將官有闕不以年為限許本司銓量

人材膽勇服衆上聞補用詔從其請此誠砥礪兵將之良法也嘉定中樞密院言諸軍轉員遷補務在均一如內諸班直循舊格排連積習既久往往超躐升轉後名反居前列高下不倫甚失公平之意今參酌前後例格均次資序其一曰內殿直左第一班副都知轉東西班西第二都知內殿直左第二班副都知轉散直左班都知其二曰散員左第二班副都知升內殿直左第一班副都知散員右第一班副都知升內殿直左第一班副

都知其三曰散員右第一班副都知升內殿直右第一  
班副都知散員左第二班副都知升內殿直右第二班  
副都知其四曰散指揮左第一班副都知升散員左第  
一班副都知散指揮右第一班副都知升散員右第一  
班副都知其五曰散指揮左第二班副都知升散員左  
第二班副都知散指揮右第三班副都知升右第二班  
副都知其六曰散都頭左班副都知升散指揮左第一  
班副都知散都頭右班副都知升散指揮右第一班都

知其七曰散祗候左副都知升散指揮左第一班副  
都知散祗候右副都知升散指揮右第二班副都知  
其八曰內殿直左第一班押班遷轉東西班西第一班  
副都知內殿直右第二班押班轉東西班西第三班副  
都知以上各係升四名外御龍直御龍左第一直十將  
轉御龍弓箭直副都頭御龍直右第一直十將轉御龍  
弩直副都頭御龍骨朵子直左第一直十將升御龍弓箭左  
第一直十將御龍弩直左第一直十將升御龍弓箭左

第三直十將係各升六名於是超躐積習之弊盡革而為定制焉淳祐十一年御史臺條奏軍功賞格違法之弊在法邊戍獲捷竒功暴露撤戍者制閫軍師舉奏授官必其人身親行陣有戰禦功今自守闕進勇副尉至承信郎承節郎者其弊尤多迺以奉權要酬私恩或轉售於人方等第功賞之初即竄名其中朝廷審核動涉歲年已無稽考甚至承受廳吏廝卒之流足跡未嘗出都門而沾親冒矢石往來軍旅之恩授以名器請申嚴

師閫令立功人親授告身庶革冒濫寶祐五年樞密院  
言應從軍職事必立戰功并隊伍中人曾經拍試武藝  
若訓練官以遞而升者或年限未及仍帶權字俟年及  
方升正統制此定法也近年任子雜流冒授者纔無差  
遣便請從軍繇統領至總管曾幾何時超躐而進甫得  
總管却恥軍職輒稱私計不便或托父母老疾巧計離  
軍又以筋力未衰求差正任甚非法意至咸淳中大將  
若呂文德夏貴孫虎臣范文虎輩矜功怙寵慢上殘下

行伍功賞視為己物私其族姻故舊俾戰士身膏於草莽而姦人坐竊其勲爵矣

屯戍之制凡遣上軍軍頭司引對賜以裝錢代還亦入見犒以飲食簡拔精銳退其癃老至於諸州禁廂軍亦皆戍更隸州者曰駐泊戍蜀將校不遣都虞候當行者易管他營凡屯駐將校帶遙郡者以客禮見長吏餘如屯駐將校凡駐泊軍若捍禦邊寇即總管鉉轄共議州長吏等毋預事涉本城并屯駐在城兵馬即知州都監

監押同領若州與駐泊事相關者公牒交報凡戍更有  
程京東西河北河東陝西江淮兩浙荆湖川峽廣南東  
路三年廣南西路二年陝西城砦巡檢并將領下兵半  
年景祐元年詔若聞陝西戍卒多為大將選置麾下及  
偏裨臨陣鮮得精銳自隨自今以全軍隸逐將母得選  
占三年詔廣桂荆潭鼎澧六州各置雄畧一營與歸遠  
軍更戍嶺外康定元年頒銅符木契傳信牌銅符上篆  
刻曰某處發兵符下鑄虎豹為飾而中分之右符伍左

旁作虎豹頭四左符五右旁為四竅令可勘合又以篆文相向側刻十干字為號一甲己二乙庚三丙辛四丁壬戊戌左符刻十干半字右符止刻甲己等兩半字右五符留京師左符降總管鈐轄知州軍官高者掌之凡發兵樞密院下符一至五周而復始指揮三百人至五千人用一虎一豹符五千人已上用雙虎豹符樞密院下符以右符第一為始內匣中緘印之命使者齎宣同下云下第一符發兵與使者復緘右符以還仍疾置

聞所在籍下符資次日月及兵數毋得付所司其木契  
上下題某處契中剖之上三枚中為魚形題一二三下  
一枚中刻空魚令可勘合左旁題云左魚合右旁題云  
右魚合上三枚留總管鈐轄官高者掌之下一枚付諸  
州軍城砦主掌之總管鈐轄發兵馬百人已上先發上  
契第一枚貯以韋囊緘印之遣指揮齋牒同往所在驗  
下契與上契合即發兵復緘上契以還仍報總管鈐轄  
其發第二第三契亦如之掌契官籍發契資次日月及

兵數以為驗傳信牌中為池槽藏筆墨紙令主將掌之  
每臨陣傳命書紙內牌中持報兵官復書事宜內牌中  
而還主將密以字為號驗毋得漏泄軍中事呂夷簡言  
自元昊反被邊城砦各為自守計萬一賊有奔衝即關  
輔驚擾雖夏竦等屯永興其實兵少自永興距鄜延環  
慶諸路皆數百里設有急緩內外不能相救請募勇敢  
士三萬訓以武技分置十隊以有謀勇者三人將之分  
營永興西寇至則舉烽相應或乘勢討擊進退不以地

分竝受夏竦等節制詔從之初趙元昊反以夏竦陳執  
中知永興軍節度陝西諸軍久之無功乃析秦鳳涇原  
環慶鄜延為四路以秦渭慶延知州分領本路馬步軍  
是歲罷銅符木契詔曰陝西屯重兵整本路租稅益以  
內庫錢帛并西川歲輸而軍儲猶不足宜度隙地為營  
田務四路總管轉運悉兼領使慶厯二年詔已發士三  
萬戍永興委總管司部分閱教歲以八月遣萬五千人  
戍涇原儀渭州鎮戎軍十二月以萬五千人代至二月

無警即還歲以為常葛懷敏等喪師命范仲淹韓琦龐籍復統四路軍期中覆不及者以便宜從事四年夏人已納款乃罷四月帝謂輔臣曰湖廣擊蠻吏士方夏瘴熱而惟疾者衆宜遣醫往為胗視六年詔騎軍以盛夏出戍馬多道死自今以八月至二月遣發又詔廣南方春瘴癘成兵在邊者權休善地其自嶺外戍回軍士予休兩月李昭亮上言舊制調發諸軍先引見試以戰陣遷補校長今或不暇試戰陣請選彊壯有武技者每十

人引見轉資後遣詔可時契丹使來議關南地朝廷經  
制河北武備議者欲增兵屯程琳自大名府徙安撫陝  
西上言曰河朔地方數千里連城三十六民物繁庶川  
原坦平自景德以前邊數有警官軍雖衆罕有成功蓋  
定州真定府高陽關三路之兵形勢不接召發之際交  
錯非便況建全魏以制北方而兵隸定州真定府路其  
勢倒置請以河朔兵為四路以鎮定十州軍為一路合  
兵十萬人高陽關十一州軍為一路合兵八萬人滄霸

七州軍為一路合兵四萬人北京九州軍為一路合兵八萬人其駐泊鉢轄都監各掌訓練使士卒習聞主將號令急緩即成部分天子下其章判大名府夏竦奏鎮定二路當內外之衝萬一有警各藉重兵控守要害迭為應援若合為一則兵柄太重減之則不足以備敵又滄州久隸高陽關道里頗近瀕海斥鹵地形沮洳東北三百里野無民居非賊蹊徑萬一有警可決漳御河東灌塘淀隔越賊兵未易奔衝不必別建一路惟北京為

河朔根本宜宿重兵控扼大河南北內則屏蔽王畿外  
則聲援諸路請以大名府澶懷衛濱棣德博州通利軍  
建為北京路四路各置都總管副都總管一人鉅轄二  
人都監四人平時祇以河北安撫使總制諸路有警即  
北京置四路行營都總管擇嘗任兩府重臣為之議未  
決竦入為樞密使賈昌朝判大名府復命規度昌朝請  
如竦議惟保州沿邊巡檢并雄霸滄州界河二司兵馬  
國初以來拓邊最號彊勁今未有所隸請立沿邊巡檢

司隸定州路界河司隸高陽關路於是下詔分河北兵為四路北京澶懷衛德博濱棣州通利保順軍合為大名府路瀛莫雄霸貝冀滄州永靜乾寧保定信安軍合為高陽關路鎮邢洺相趙磁州合為真定府路保深祁州北平廣信安肅順安永寧軍合為定州路凡兵屯將領悉如其議韓琦謂兵勢大分請合定州真定府為一高陽關大名府為一朝廷以更寘甫新不報詔四路兵依陝西遣部將往來按閱又詔自今兵戍回揀擣日龍

衛天武神衛等軍皇祐元年發禁兵十指揮戍京東以  
歲饑備盜詔陝西邊警既息土兵可備守禦東軍屯戍  
者徙內郡以省餉饋二年詔如聞河北諸屯將校有老  
疾廢事而不知退有善部勒著勞效而不得進帥臣監  
司審察密以名聞四年詔戍兵歲滿有司按籍遠者前  
二月近者前一月遣代戍遷本營聽休五月又詔廣西  
戍兵及二年而未得代者罷歸鈐轄司以土兵歲一代  
之自儂智高之亂戍兵踰二萬四千至是聽還而令土

兵代戍至和元年詔陳許鄭滑曹州各屯禁兵三千嘉祐五年用賈昌朝奏京北路置都監三人駐劄許蔡鄭州分督近畿屯兵七年詔陝西土兵番戍者毋出本路治平二年發兵指揮二十分戍永興軍邠州河中府仍遣官專掌訓練三年詔員僚直龍衛母出戍神衛常留十指揮在營又詔頃以東兵戍嶺南冒犯瘴癘得還者十無五六自今歲滿以江淮教閱忠節威果代之神宗嗣位軍政多所更革熙寧初嘗與輔臣論河北守備韓

絳等曰漢唐重兵皆在京師其邊戍裁足守備而已故  
邊無橫費彊本弱末其勢亦順開元後有事四夷權臣  
皆節制一方重兵在西北天寶之亂由京師空虛賊臣  
得以肆志也帝曰邊上老人亦謂今之邊兵過於昔時  
其勢如倒植浮圖朕亦每以此為念也三年詔諸路戍  
兵畊零不成部伍致乖紀律或互遣郡兵更相往來道  
路艱梗宜悉罷之易以上番全軍或就糧兵為戍當遣  
者並隸總管司以詔令從事舊制河北軍馬不出戍帝

慮其驕惰五年始命河北河東兵更戍減其一歲以優之其年詔徙河州軍馬駐熙州熙州軍馬駐通遠軍追召易集可省極邊軍儲帝嘗曰窮吾國用者冗兵也其議徙軍於內郡以弓箭手代之冀省邊費九年詔京師兵比留十萬餘以備四方屯戍數甚減少自今戍兵非應發京師者勿遣其後言者屢請損河北冗兵詔立額止留禁兵七萬而京東增置武衛軍四十二營訓練精銳皆以分隸河北而以三千人散戍東南杭揚江寧諸

州以備盜賊嶺外惟廣韶南雄州常有戍兵千人桂林  
以瘴癘間徙軍於全永元豐中或請遣陝西路騎軍五  
七百戍桂林者詔遣在京軍馬以戍之元祐元年六月  
右諫議大夫孫覺言將兵之禁宜可少解而責所在守  
臣與州郡兵官可令乘時廣行召募稍補前日之額循  
祖宗之法使屯駐三邊及川廣福建諸道州軍往潤道  
路足以服習勞苦南北番戍足以均其勞佚詔陝西路  
東廣南將兵不輪戍他路河北輪近裏一將赴河東府

界諸路逐將與不隸將兵並更互差撥出戍別路赴三  
路者差全將或半將餘路聽全指揮分差仍不過半將  
十月樞密院言東南一十三將自團將以來未曾均定  
出戍路分及不隸將兵內有出戍窠名數少所管指揮  
數多去處未得均當欲除廣南東西兩路駐劄三將只  
充本路守禦差使虔州第六將全永州第九將準備廣  
南東西路緩急勾抽策應並不差戍他路外餘八將及  
不隸將兵依均定路分都鈐轄司駐泊分擘差使內將

兵不隸將兵路分却於自京差撥步軍前去補戍候將  
兵回日却行勾抽從之十二月廣西經畧安撫使都鈐  
轄司言乞闕宜融欽廉州係將不係將馬步軍輪  
差赴邕州極邊水土惡弱砦鎮監柵及巡防并都同巡  
檢等處並乞依邕州條例一年一替其餘諸州差往邕  
州永平古萬太平橫山遷隆砦鎮及左右江溪洞巡檢  
并欽州如昔峒駐劄抵棹砦並二年一替其諸州巡檢  
下一年一替從之二年河東經畧安撫使曾布言河外

上番四將每將內抽減步軍赴嵐石州分摩沿河等處  
差使代開封府界等五將兵馬歸營及赴岢嵐火山軍  
駐劄代東兵兩指揮赴太原府就食從之是月樞密院  
言昨為熙河蘭會路戍兵數多尋以年滿二千餘人節  
次抽減歸營兼本路即日見管戍兵比額尚多一千三  
百餘人今朝旨令熙河蘭會路都總管司遇本路緩急  
關人許於秦鳳路勾抽一將應副緣本路即日事宜慮  
向秋闕人防守欲熙河蘭會路都總管司遇本路緩急

關人聽全勾抽秦鳳路九將應副差使從京東差步軍  
五指揮赴永興軍商虢州權駐劄以備秦鳳路勾抽從  
之紹聖四年樞密院備呂惠卿所言比緣邊謀報西界  
點集本路叛卒見關守禦人兵兼土兵未填額并蕃  
兵弓箭手比元豐元年少二千二百有餘東兵馬步軍  
比元豐四年七年少十六指揮乞於東兵步人內差撥  
一十六指揮添助防守兼本路自去歲泛差過軍馬三  
十六指揮比之他路已是倍多即今戍兵二萬六千餘

人比之元豐四年人數亦不至闕少自可那融使喚詔  
鄜延路都總管司詳此照會如遇賊兵犯塞或本路舉  
兵委是闕人其年滿人指揮兵級令相度事宜權留三  
兩月候事宜稍息遣還是月詔河東路總管司那融替  
換土番兵馬無令戍邊日久致有勞弊如無人替換候  
春月事宜稍息即先後上番四將抽減一番兵馬歸營  
元符二年閏九月遣秦鳳戍兵十指揮應副熙河新邊  
戍守十一月以呂惠卿奏減鄜延戍兵五十指揮三年

八月詔遣虎翼軍六千戍熙河路令代蕃兵及弓箭手  
還家休息十二月詔邊帥減額外戍兵崇寧四年詔廣  
南瘴癘之鄉東西雖殊氣候無異西路戍兵二年一代  
而東路獨限三年代不如期有墮於瘴癘者朕甚惻然  
其東路亦令二年一替前期半年差人如違以違制論  
大觀二年六月詔陝西諸路自罷兵以來數年于此兵  
未曾徹蓋緣邊將怯懦坐費邊儲戍卒勞苦除新邊  
的確人外餘立依元豐罷邊事日戍額人數外餘立直

抽歸營有司不得占客如違以違制論又詔東南除見  
兵額外帥府別屯二千人望郡一千人帥府置奉錢五  
百一指揮以威捷為名望郡奉錢四百一指揮以威勝  
為名帥府三指揮望郡一指揮各奉錢三百以全捷為  
名竝以步軍五百人為額三年六月詔國家承平百五  
十年東南一方地大人衆已見兵寡勢弱非持久之道  
可除見今兵額外帥府別屯兵士二千人望郡一千人  
宣和二年詔河北軍馬與陝西河東更戍三年正月詔

河北軍馬與陝西河東更戍非元豐法遂罷其令應拖  
後人竝與免罪依舊收管閏五月江浙淮南等路宣撫  
使童貫奏勘會江南東路兩浙東西路各有東南一將  
平日未嘗訓練武藝臨敵必誤驅策昨睦寇初發天兵  
未到已前遣令上項將兵捕賊遂致敗衄亡失軍兵甚  
多今睦賊討平之後脅從叛亡者方始還業非增戍兵  
鎮遏無以潛消兇暴臣今擬留戍兵二萬五千五百七  
十八人分置江南東路兩浙東西路州軍防把一年滿

替出軍一次依平蠻故事每月別給錢三百歲給鞋錢一千其兵並隸本路安撫司統轄訓練詔從之是年權知婺州楊應誠奏凡屯戍將兵須隸守臣使兵民之任歸一則號令不二然後可以立事詔從之續有旨改從舊制四年臣僚言東軍遠戍四川皆京師及府界有武藝無過之人既至川路分屯散處多不成隊而差使無時委致勞弊蓋四川土兵既有詔不得差使則其役併著東軍實為偏重若令四川應有土兵禁軍與東軍一

同差使不惟勞逸得均抑亦不失熙豐置東寧彈壓蜀人兼備蠻寇之意詔本路鈐轄轉運兩司公同相度利害以聞五年制置所奏江浙增屯戍兵相度節鎮增添兩指揮處餘州各一指揮各不隸將內兩指揮處將一指揮以威果為名一指揮以全捷為名餘州竝以威果為名從之七年三月詔廣南東西路地遠山險盜賊間有竊發內郡戍兵往彼屯守多緣瘴癘疾病不任捕盜又不諳知山川道里林壑曲折故盜不能禁可令每巡

檢下招置土人健勇輕捷者參戍兵之半互相關防易於擒捕令樞密院行之靖康元年四月以种師道為太尉依前鎮洮軍節度使河北河東宣撫使後加同知樞密院事時師道駐軍滑州實無兵從行請合山東陝西京畿兵屯於青滄滑衛河陽預為防秋之計徐處仁等謂金人重載甫還豈能復來不宜先自擾費示之以弱議格不行七月河北東路宣撫使李綱奏臣兩具論以七月七日指揮止諸路防秋之兵為不可必蒙聖察今

宣撫司既無兵可差不知朝廷既止諸路防秋之兵將何應副兼遠方人兵各已在路又已借請數月本路漕司州縣又已預備半年百日之糧今一放散皆成虛費而實要兵用處無可擗那深恐誤國大計詔依所奏紹興之初羣盜四起有若岳飛劉光世諸大將領兵尤重隨宜調發屯泊要害控制捍蔽是亦權宜之利矣厥後樞府帥臣屢言久戍之弊甚者或十年或二十年而不更尤可閔念蓋出戍者皆已老瘁而諸州所留類皆少

壯及工匠三司多以坐甲為名占留違制有終身未嘗一日戍者於是命帥臣鈐轄司置諸州尺籍定其姓名依期更戍帥臣又言有如貴溪戍兵三月一更繇貴溪至池州往反一千五百里即是一月在途徒有勞費願以一年終更今攷紹興間邊境弗靖故以大軍屯戍而踐更之期近者三月遠者三年建和議既成諸軍移屯者漸歸營矣惟防秋仍用移屯更戍之法沿河備禦亦倚重焉乾道淳熙紹熙之際一遵其制開禧初復議用

兵駐劄諸兵始復移屯和議再成邊地一二要郡雖循舊貫其諸駐劄更戍之法不講而常屯之兵益多逮夫端平破川蜀咸淳失襄樊裂淮甸疆宇蹙而兵法壞叛將賣降庸夫秉鉞間有圖國忘死之士則遙制于權姦移屯更戍靡有定方於是戍卒疲於奔命不戰而斃者衆矣至若將校之部曲諸軍之名號士卒之衆寡詳列于屯駐者茲不重錄云

宋史卷一百九十六